

**SOALAN MQT NO. 1**

**PEMBERITAHUAN PERTANYAAN BAGI JAWAPAN LISAN**

**MESYUARAT PERTAMA, DEWAN RAKYAT**

**PENGGAL PERTAMA, PARLIMEN KEEMPAT BELAS**

**MAJLIS MESYUARAT DEWAN RAKYAT**

**PERTANYAAN : MQT**

**DARIPADA : DATO' NORAINI BINTI AHMAD**

**[ PARIT SULONG ]**

**TARIKH : 16 OGOS 2018 (KHAMIS)**

**SOALAN :**

**Dato' Noraini binti Ahmad** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah tindakan atau inisiatif yang akan dilaksanakan oleh Kementerian terhadap 13,700 orang pengasuh kanak-kanak yang berusia kosong hingga 4 tahun yang berdaftar tetapi masih tidak memenuhi kelayakan minimum lulus Kursus Asuhan dan Didikan Awal PERMATA (KAP) ini.

**JAWAPAN: YAB DATO' SERI DR. WAN AZIZAH DR. WAN ISMAIL,  
TIMBALAN PERDANA MENTERI MERANGKAP  
MENTERI PEMBANGUNAN WANITA, KELUARGA  
DAN MASYARAKAT**

Tuan Yang di-Pertua,

Kementerian Pembangunan Wanita, Keluarga dan Masyarakat (KPWK) sentiasa memastikan perkhidmatan yang berkualiti di Taman Asuhan Kanak-kanak (TASKA) dikendalikan oleh pengusaha dan pengasuh terlatih. Untuk makluman, industri pengasuhan merupakan satu industri baru (*new industry*) yang masih belum berkembang dengan sempurna.

Hal ini didorong oleh cita rasa dan kemampuan ekonomi keluarga terhadap perkhidmatan, menyebabkan permintaan dan penawaran dalam pasaran industri ini kurang memuaskan. Oleh yang demikian, kebanyakan pengasuh sanggup menerima bayaran gaji yang rendah sementara menunggu tawaran pekerjaan yang lebih baik.

Sehingga Jun 2018, terdapat seramai 16,873 pengasuh yang berkhidmat di TASKA yang berdaftar dengan Jabatan Kebajikan Masyarakat (JKM). Daripada jumlah ini, seramai 13,700 pengasuh yang tidak memenuhi

syarat minimum disebabkan oleh beberapa faktor, antaranya kadar tukar ganti (*turn over*) yang tinggi dalam kalangan pengasuh. Sebagai contoh, seramai 5,720 orang telah lulus KAP pada tahun 2013, walau bagaimanapun hanya 2,171 orang masih kekal di dalam industri pengasuhan kanak-kanak sehingga kini.

Satu lagi faktor adalah Peraturan 14(3) Peraturan-Peraturan TASKA 2012 memberi tempoh 12 bulan kepada pengasuh untuk melengkapkan KAP. Dengan mengambil kira *turn over* yang tinggi dalam kalangan pengasuh, Kementerian menjangkakan daripada 13,700 orang tersebut, kebanyakannya merupakan pengasuh yang baru berkecimpung dalam industri ini.

Bagi memastikan lebih ramai pengasuh menghadiri KAP, Kementerian telah:

1. Melaksanakan KAP *Massive Open Online Courses* secara atas talian dengan kerjasama JKM dan Universiti Pendidikan Sultan Idris Holdings Sdn. Bhd. yang mempunyai waktu pembelajaran fleksibel dan yuran kursus yang lebih murah;

2. Mengiktiraf lebih banyak agensi latihan yang mengendalikan latihan pengasuhan bertauliah KAP; dan
3. Memperhalusi Akta Taman Asuhan Kanak-kanak untuk mewajibkan semua pengasuh kanak-kanak mempunyai syarat kelayakan dalam bidang pengasuhan dan pendidikan awal kanak-kanak, termasuk pengasuh di rumah yang akan mengikuti kursus khas berkaitan kemahiran pengasuhan kanak-kanak.

Tuan Yang di-Pertua,

Kementerian komited untuk memastikan semua pengasuh kanak-kanak adalah berkelayakan dan memberi perkhidmatan berkualiti agar keselamatan dan kebajikan kanak-kanak di TASKA sentiasa terjamin.

**PEMBERITAHUAN PERTANYAAN BAGI JAWAPAN LISAN**

**MESYUARAT PERTAMA, DEWAN RAKYAT**

**PENGGAL PERTAMA, PARLIMEN KEEMPAT BELAS**

**MAJLIS MESYUARAT DEWAN RAKYAT**

**PERTANYAAN : JAWAB LISAN**

**DARIPADA : PUAN MARIA CHIN BINTI ABDULLAH**

**[ PETALING JAYA ]**

**TARIKH : 16 OGOS 2018 (KHAMIS)**

**SOALAN :**

**Puan Maria Chin Binti Abdullah [ Petaling Jaya ] minta MENTERI PEMBANGUNAN WANITA, KELUARGA DAN MASYARAKAT menyatakan statistik perkahwinan di bawah umur 18 tahun serta menjelaskan bagaimana undang-undang menjaga kebajikan kanak-kanak dan remaja yang terlibat supaya mereka dilindungi daripada eksploitasi.**

**JAWAPAN: YAB DATO' SERI DR. WAN AZIZAH DR. WAN ISMAIL,  
TIMBALAN PERDANA MENTERI MERANGKAP  
MENTERI PEMBANGUNAN WANITA, KELUARGA  
DAN MASYARAKAT**

Tuan Yang di-Pertua,

Berdasarkan rekod Jabatan Kehakiman Syariah Malaysia (JKSM), bagi **pasangan Muslim**, jumlah permohonan perkahwinan bawah umur 18 tahun bagi tempoh 2013 sehingga 2017 mencatatkan sebanyak **5,362 kes**. Manakala dalam **pasangan bukan Muslim**, rekod Jabatan Pendaftaran Negara (JPN) bagi perkahwinan bawah umur 18 tahun mencatatkan sebanyak **2,367 kes** bagi tempoh yang sama.

Buat masa ini, di bawah perundangan sedia ada seperti Akta Undang-undang Keluarga Islam (Wilayah-Wilayah Persekutuan) 1984 dan Enakmen/Ordinan Undang-undang Keluarga Islam di negeri-negeri serta Akta Membaharui Undang-Undang (Perkahwinan dan Perceraian) 1976 memperuntukkan bahawa permohonan perkahwinan bawah umur, hendaklah mendapat kebenaran daripada Hakim Syarie (bagi Muslim) dan Ketua Menteri (bagi bukan Muslim). Manakala, Enakmen Mahkamah Anak Negeri 1992 di Sabah dan pelbagai undang-undang adat kaum

peribumi di Sarawak adalah bagi perkahwinan dalam pelbagai etnik di Sabah dan Sarawak. Sehubungan itu, sebagai tindakan dalam mengekang perkahwinan bawah umur ini, kerajaan mengambil langkah-langkah seperti berikut:

**a. Kepentingan Program Kesedaran dalam Pendidikan Kesihatan Reproduksi:**

Berdasarkan kepada tinjauan ringkas berhubung dengan perkahwinan kanak-kanak yang telah dijalankan oleh UNICEF pada tahun ini, fokus yang perlu diutamakan selain daripada perundangan adalah meningkatkan kesedaran ibu bapa dan masyarakat terhadap kesan negatif perkahwinan kanak-kanak. Perkahwinan pada usia yang muda menafikan hak kesihatan, pendidikan, keselamatan dan perkembangan diri mereka. Kementerian melalui Lembaga Penduduk dan Pembangunan Keluarga Negara (LPPKN) dan pemegang taruh yang berkaitan telah melaksanakan pendidikan kesihatan reproduktif di bawah Program Pendidikan Kesihatan Reproduksi dan Sosial (PEKERTI) sebagai tambahan kepada pendidikan seks di sekolah. Melalui Program ini, kanak-kanak terutamanya kanak-kanak perempuan akan lebih memahami hak reproduktif masing-masing lalu tidak terjebak dengan aktiviti yang tidak bermoral yang boleh

menyebabkan dijangkiti penyakit-penyakit STD (penyakit jangkitan seksual) seperti HIV/AIDS.

**b. Pembasmian Kemiskinan dan Meningkatkan Taraf Hidup:**

Salah satu ciri perkahwinan bawah umur di negara ini adalah mereka dari latar belakang keluarga yang berpendidikan rendah dan berpendapatan rendah. Kerajaan akan pastikan kerjasama erat antara agensi berkaitan untuk menghapuskan kemiskinan, meningkatkan taraf pendidikan dan taraf hidup komuniti luar bandar dan memberi peluang pemerikasaan ekonomi untuk memastikan keluarga tidak memilih mengahwinkan anak-anak mereka bagi meringankan beban keluarga.

**c. Pelaksanaan Secara Perundangan (menaikkan had umur minimum kepada 18 tahun):**

Dalam merangka penyelesaian jangka panjang terhadap isu ini, Kerajaan melalui Menteri di Jabatan Perdana Menteri (Agama) dan (Undang-Undang), Kementerian Dalam Negeri dan Kerajaan Negeri Sabah dan Sarawak akan melakukan usaha untuk menetapkan had umur minimum bagi perkahwinan di dalam semua perundangan kepada 18 tahun. Ia akan melibatkan undang-undang seperti Akta Undang-undang Keluarga Islam (Wilayah-Wilayah Persekutuan)



1984, Enakmen/Ordinan Undang-undang Keluarga Islam di negeri-negeri, Akta Membaharui Undang-Undang (Perkahwinan dan Perceraian) 1976, Enakmen Mahkamah Anak Negeri 1992 di Sabah, dan pelbagai undang-undang adat kaum peribumi di Sarawak.

Memandangkan Malaysia mempunyai adat dan budaya yang tersendiri mengikut kaum dan kepercayaan, perundingan akan diadakan bersama pakar-pakar berkaitan termasuk pakar kanak-kanak dan pakar budaya bagi memastikan pandangan semua pihak diambil kira dalam penetapan had umur minimum ini.

Dalam perkara ini, saya ingin mengucapkan syabas kepada Negeri Selangor dan Sarawak atas pengumuman baru-baru ini berkenaan penetapan had umur minimum bagi perkahwinan. Saya berharap negeri-negeri lain akan turut mengambil langkah yang sama.